

दिनांक : 07.01.2026

समय : 18.45 बजे

- मुख्यमंत्री भजनलाल शर्मा विकसित भारत-जी राम जी ने गांवाई हलकां मांय नौकरी-धंधा रा मौका तैय करण री दिशा मांय ऐतिहासिक कदम बतायो ।
- पुलिस रा अहलकारां रो राज्य स्तर रो सम्मेलन काल जयपुर मांय सरू व्हेला ।
- प्रदेश मांय हाड़ कंपावण वाळी ठारी -25 जिलां मांय 8वीं कक्षा ताई रा बच्चां सारू 10 जनवरी ताई छुट्टी रो ऐलाण ।
- नई दिल्ली मांय व्हेवण वाळा विकसित भारत यंग लीडर्स डायलॉग मांय राजस्थान ऊं करीब एक सौ नौजवान भाग लेवेला ।

000

मुख्यमंत्री भजनलाल शर्मा कह्यो है के विकसित भारत-रोजगार अर आजीविका मिशन गारंटी कानून-वीबी जी राम जी गांवाई हलकां मांय नौकरी-धंधा रा मौका तैय करण री दिशा मांय ऐतिहासिक कदम है। वे आज सिंज्या ई बारा मांय खबरनवीसां सागे बातचीत कर रह्या हा। श्री शर्मा कह्यो के मनरेगा मांय रही खामियां रे कारण जनता री रकम सही तरीका ऊं काम नहीं ली जा सक रही ही।

श्री शर्मा कह्यो के वीबी-जी राम जी कानून ऊं गांवाई हलकां मांय स्थायी अर गुणवत्तापूर्ण संपत्तियां बणायी जा सकेला। वे कह्यो के ओ कानून गांवाई हलकां मांय काम-धंधा ऊं जुड़ी नीति ने विकसित भारत रा रोडमैप ऊं जोड़ेला अर राज्य ने इण रो पूरो फायदो मिलेला। मुख्यमंत्री कह्यो के ई रा तैत जल संसाधन, गांवाई हलकां मांय बुनियादी ढांचा, आजीविका अवसंरचना अर आपदा प्रबंधन ऊं जुड़्या ठोस अर टिकाऊ काम कराया जावेला।

मुख्यमंत्री कह्यो के जियो-टैगिंग, सैटेलाइट इमेजरी, मोबाइल ऐप अर ए.आई. सरीखी नुवी तकनीकां काम ले र साफगोई तैय करी जावेला। ई सारू हर छह महीना मांय डिजिटल तथ्यां सागे सोशल ऑडिट जरूरी बणायी ज्यी है।

000

उपमुख्यमंत्री दिया कुमारी आज जयपुर रा विद्याधर नगर हलका मांय नौ करोड़ पिचासी लाख रुपया रा खर्च ऊं सड़कां बणावण अर रोड लाइटां लगावण रा काम री सरूआत कीनी। ई मौके वे कह्यो के आं कामां ऊं आवण-जावण आसान व्हेला अर औद्योगिक हलका मांय कारोबार और तेज व्हेला। दिया कुमारी कह्यो के विकसित राजस्थान रो संकल्प पूरो करण सारू मजबूत बुनियादी ढांचो जरूरी है। उपमुख्यमंत्री कह्यो के राज्य मांय विकास रा काम तेजी ऊं कराया जा रह्या है अर लारला दो साल मांय अपराधां री रेट मांय उन्नीस फीसदी ताई री कमी आई है।

000

विधानसभा मांय सवाल पूछण रे बदले घूस लेवण रा मामला मांय आज जयपुर मांय विधानसभा री खास समिति री मीटिंग राख्यी ज्यी। समिति रा सभापति कैलाश वर्मा बतायो के ई मामला मांय बागीदौरा रा विधायक जयकृष्ण पटेल माथे लगायी ज्यी आरोप घणा गंभीर है अर समिति ई मामला ने बारीकी ऊं समझ र जांच कर रही है।

000

जयपुर मांय काल पुलिस रा अहलकारां रो राज्य स्तर रो सम्मेलन सरू व्हेला। मुख्यमंत्री भजन लाल शर्मा रो राजस्थान पुलिस अकादमी मांय राख्या जावण वाळा दो दिन रा ई सम्मेलन रो उदघाटन करण रो कार्यक्रम है। सम्मेलन मांय प्रदेश रा सगळा जिलां रा एस.पी., रेंज आईजी अर पुलिस मुख्यालय रा आला अहलकार शामिल व्हेला। सम्मेलन मांय पुलिस रा कामकाज रा तरीका ने नुवी तकनीक री मदद ऊं करण सागे ई कानून-व्यवस्था ने मजबूत बणावण रा बारा मांय चर्चा करी जावेला। ई सम्मेलन मांय छत्तीसगढ़ रा रायपुर मांय व्ही राष्ट्रीय डीजी-आईजी कॉन्फ्रेंस मांय करी ज्यी फ़ैसलां ने राज्य मांय लागू करण रो मजमून तैयार कर्यो जावेला। सम्मेलन रा न्यारा-न्यारा सत्रां मांय साइबर अपराधां री रोकथाम, महिलावां री हिफाजत अर आतंकवाद रे खिलाफ उपायां रा बारा मांय पुलिस रा आला अहलकार जाणकारियां साझा करेला।

000

प्रदेश मांय जोरदार ठारी पड़ रही है। आज जयपुर, कोटा, बीकानेर, अजमेर, भरतपुर अर उदयपुर संभाग रा कुछ हलकां मांय घणी धुंअर रही। केई ठौड़ां पारो चार ऊं आठ डिग्री सेल्सियस ताई उतर्यो। घणखर ठौड़ां दिन रा तापमान मांय ई गिरावट आयी। अधिकांष ठौड़ां रात री बगत पारो 4 ऊं 10 डिग्री सेल्सियस बीचे, जदके दिन मांय 25 डिग्री सेल्सियस ऊं कम दर्ज करी ज्यो। राज्य रा मैदानी हलकां मांय झुन्झुनूं जिला रो पिलानी राज्य मांय सब ऊं ठण्डी ठौड़ रह्यो। सिरोही जिला रा माउंट आबू मांय पारो शून्य ऊं एक डिग्री सेल्सियस नीचे उतर ग्यो। म्हाणा सिरोही खबरनवीस बतायो के वठे आज संवारे बर्फ रीहल्की परत निजर आयी।

ई बीचे पूरा राज्य मांय घणी धुंध ऊं हवाई जहाजां, मोटरगाड़ियां अर रेलों री आवण-जावण माथे असर पड़्यो। जयपुर हवाई अड्डा माथे दूर ताई निजर नी आवण रे कारण 8 उड़ानां मोड़ी व्ही, जदके केई रेलगाड़ियां ई मोड़ी चाल रही है। आज संवारे अजमेर, कोटा, भरतपुर अर दौसा समेत राज्य रा घणखर जिलां मांय दोपहरां ताई धुंअर रही। राजधानी जयपुर मांय संवारे री पोर दूर ताई कांई निजर नी आ रह्यो हो। धुंअर रे कारण दिन मांय ई गाड़ियां री लाइटां जळा र वां ने कम रफतार ऊं चलानी पड़ी। ई बीचे जोरदार ठारी ने ध्यान राखता थकां 25 जिलां मांय 8वीं कक्षा ताई रा विद्यार्थियां सारू 10 जनवरी ताई छुट्टी रो ऐलाण कर दियो ज्यो है। मौसम विभाग रे मुजब आवता दो-तीन दिन राज्य रा कुछ हलकां मांय संवारे री पोर घणी धुंअर रेहवण अर एकदम ठण्डा दिन व्हेवण रा आसार हैं। मौसम केन्द्र जयपुर रा निदेशक राधेश्याम शर्मा बतायो के राज्य रा उतराद हलकां मांय आवता 48 घंटां मांय शीतलहर री षंका है।

000

नई दिल्ली रा भारत मंडपम मांय 9 ऊं 12 जनवरी ताई 'विकसित भारत यंग लीडर्स डायलॉग 2026' राख्यो जावेला। इण मांय राजस्थान ऊं ई करीब 100 नौजवान शामिल व्हेला। राज्य मांय 'माय भारत' रा निदेशक कृष्ण लाल जयपुर मांय खबरनवीसां सागे आ जाणकारी दीनी। वे बतायो के ओ दल काल राज्यपाल हरिभाऊ बागडे अर मुख्यमंत्री भजनलाल शर्मा सागे मुलाकात पाछे दिल्ली सारू रवाना व्हेला।

प्रधानमंत्री नरेंद्र मोदी रो ई रा समापन समारोह ने संबोधित करण रो कार्यक्रम है। इण मांय नौजवानां ने राष्ट्रीय सुरक्षा सलाहकार अजीत डोभाल अर दूजी हस्तियां सागे बातचीत रो ई मौको मिलेला।

000

उदयपुर मांय काल सहकारिता मंत्रालय री जोनल रिव्यू कॉन्फ्रेंस सुरू व्हेला। दो दिन री ई कॉन्फ्रेंस मांय सहकारिता रा हलका मांय केन्द्र सरकार अर राज्यां री ओर ऊं चलाई जा रही न्यारी-न्यारी पहलां अर आवता बगत री रणनीति रा बारा मांय विचार कर्यो जावेला। सहकारिता विभाग री शासन सचिव अर रजिस्ट्रार आनंदी आ जाणकारी दीनी। वे बतायो के कॉन्फ्रेंस मांय देश रा सगळा राज्यां अर केन्द्र रा राज वाळा प्रदेशां रा सहकारिता सचिव अर रजिस्ट्रार शामिल व्हेला। ई दौरान सहकार सारथी, आधार सीडिंग, डिजिटल भुगतान अर डोर स्टेप बैंकिंग सेवावां रा बारा मांय ई विगतवार चर्चा करी जावेला।

000

राजस्थान युवा अर खेल महोत्सव 2026 आज जयपुर रा एस.एम.एस. स्टेडियम मांय सुरू व्ह्यो। राज्य स्तर रो ओ महोत्सव 12 जनवरी ताई चालेला। विकसित भारत-विकसित राजस्थान री सोच ने सांची करण रा काम मांय नौजवानां री भागीदारी बधावण रा मकसद ऊं राख्या जा रह्यो ई महोत्सव रे जरिये नौजवानां ने न्यारा-न्यारा कामां सारू मंच मिल सकेला। ई दौरान नौजवानां ने नौकरी-धंधा ऊं जुड़ी जानकारियां दी जावेला। राज्य रा युवा मामलात अर खेल मंत्री राज्यवर्द्धन सिंह राठौड़ रो इण उद्घाटन करण रो कार्यक्रम है। सगळा संभागां अर जिलां मांय ई युवा महोत्सव राख्यो जा रह्यो है।

000

पाली जिला मांय टी.बी. री बीमारी जड़ ऊं खत्म करण सारू चिकित्सा अर स्वास्थ्य विभाग री ओर ऊं ऑनलाइन तरीका ऊं सर्वे करायो जा रह्यो है। मुख्य चिकित्सा अर स्वास्थ्य अधिकारी डॉ. विकास मरवाल बतायो के 25 दिसम्बर, 2025 ऊं सुरू करी ज्यो ई अभियान रा दूजा दौर मांय हाल ताई साढ़े 62 हजार लोगां रो सर्वे पूरो व्हे ग्यो है। ई रा तैत आशा सहयोगिनियां अर एएनएम री मदद ऊं मोबाइल एप रे जरिये जाणकारी हासिल करी जा रही है। ओ अभियान पंद्रह जनवरी ताई चालेला।

000